



**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 20 16-imeersoq. (Soraarnerussutisiaqarnissamut aaqquissuussinernut nunani allaniittunut akiliutit akileraaruserneqartarnerat)**

(Aningaasaqarnermut Aatsitassanullu Naalakkersuisoq  
(Siullermeernera)

Naalakkersuisut isumaqatigaagut oqarmata soraarnerussutisiaqalernissamut katersat Kalaallit Nunaanni akileraarusersorneqartariaqartut, Landskarsi ullumikkutut akileraarutitigut annaasaqartaqqunagu. Uanili inatsimmi unamminartut arlaqarput, taamaattumik angertigata misissornerqarnissaat kissaatigaarput, sulisartut pisariaqanngitsumik artukkorsorumanagit.

Pissusissamisuussaaq tamatigullu pisariaqanngikkaluarluni immikkoortumi pineqartumi danskit inatsisaasa assiliniarpallaarnissaat allaffissornerujussuarmik nassataqarmata innuttaasunullu paasiuminaasinnaallutik. Periarfissaq atoriartigu pitsaasumik aamma allaffissornikkut aqunneqarsinnaasumik Kalaallit Nunaanni inatsiseqalernissarput.

Taamaattumik Naalakkersuisunut apeqquutit assigiinngitsut akillaqquagut.

Aaqquissuussinerit allaanerusumik akileraarusersorneqanngitsut tassaapput soraarnerussutisiaqalernissamut aningaasaateqarfiit Kalaallit Nunaanni angerlarsimaffilli; kisianni PFA Pension Grønlandip ingerlatai ikiliartuinnarmata, tamanna atuussimassaaq SISAMUT aamma immaqa PFA pensionimut, allanullu soraarnerussutisiaqalernissamut aningaasaqarfimmut atuunnani? Sooq taamatut assigiinngisitsisoqassava?

Allaangilaq inatsit pineqartoq aqutigalugu naalakkiutiginiarneqartoq innuttaasunut sorlermi soraarnerussutisiaqalernissaminnut katersissanersut. Isumaqatigaarput ileqqaakkanut akileraarut Kalaallit Nunaannut tuttariaqartoq kisianni pisariaqanngitsumik sulisut ilaannut pisarissersuisoqalersinnaavoq assersuutigalugu nakorsanut, ilinniagartuunut, peqqissaasunut imaluunniit allat Kalaallit Nunaanni sulisunut allanut taamaalillutalu peqqinnissaqarfimmi, ingerlatsivinni imaluunniit allani sulisussaaleqilersinnaavugut sullivinni ilinniarsimasunik sulisoqartariaqarfitsinni?

Sulisunik nammineq innuttarisatsinnik nunani allamiissimasunik ilinniariarlutik aamma maani soraarnerussutisiaqalernissamut aningaasaateqarfimmut piginngisatsinnut akilersuisunik, maani Kalaallit Nunaanni ima inoqartiginngimmat akilersinnaasumik sulliviit ilaannut



ingerlatsiviusinnaalluni, taamaattumik tamakku Naalagaaffeqatigiit ilaanni imaluunniit nunani allani soraarnerussutisiaqalernissamut aningaasaateqarfinnut akilersuisariaqartarput.

Qularnaarsimanerparput ilinniartut angerlaqqillutik sulilernissaat pisariaqanngitsumik mattutinnginnissaat?

Inuit sorliit soraarnerussutisiaqalernissamut katersanik pisalersinnaanerat pillugu titarnertaami soraarinngoreerlutik toqkkut peeruttartut pineqarnerat ersarlukujuppoq. Tamatuma sukumiisumik ataatsimiititaliami eqqartornissaa kissaatigaarput.

Naalackersuisoq tassani aamma nammineq oqarpoq ukiuni aggersuni inatsisinik assigiinngitsunik allannguisoqartariaqartassasoq, eqqussinerup kingunerisaanik.

Aaqqiinerit suut naatsorsuutigineqarpat eqqunneqartariaqassasut, aamma inatsisit attuumassutillit sorliit iluarsineqartariaqarnissaat naatsorsuutigineqarpa?

Aamma sooq inatsisit allannguutissaat takku ataatsikkut suliarisinnaanngilagut, innuttaasunut tamanut soraarnerussutisiaqalersarnermut tunngasut paasiuminartuunissaat qulakkeerlugu, pisariaarullugu kingusinnerusukkat inatsisit attuumassutillit takkuitsuukkat iluarsineqartarnissaat?

Pinngitsoortissinnaavarput aamma qularnaarsinnaavarput taamatut inatsisinik aqutsiniklut inuutissarsiortut soraarnerussutisiaqalernissaminnut katersisut pisariaqanngitsumik allaffissornerujussuarmik eqqorneqannginnissaat?

Aamma soraarnerussutisiaqalernissamut katersat akileraarutaasa ilanngaattissaat sukumiisumik suliarisariaqarpagut, saqqummiunneqartumi takusinnaannginnatsigu, innuttaasut inatsisitigut ilanngaatinik atorluaasinnaanissaat qanoq qularnaarneqassanersoq taakkumi inatsit nutaaq atuutilerpat ilungersorlutik akileraarutitigut ilanngaatit tamakkiisumik atorluarumallugit ujaarliloortalersussaapput, tamatumalu aamma pisortanut allaffissornikkut pisarissersuutaangaatsiarnissaa kiisalu sulisitsisunut pisarissersuutaangaatsiarnissaa takorloorparput.

Oqareernitsitut isumaqatigaarput Kalaallit Nunaanni sulinerlut akileraarut Kalaallit Nunaannut tuttariaqartoq aamma takusinnaavarput siunnersuummi pitsaasut arlaqartut.

Naalackersuisut isumaqatigaagut inatsiseqartariaqartugut avataaneersunik tikisitanillu sulisoqarnermut atatillugu peqquserluttoqarsinnaaneranut pinngitsoortitsisinnaasumik qularnaarlugu taakku allatulli akileraartarnissaat pisariaqanngitsumilli artukkersuinata.



Una siunnersuut siunertarissaarpoq pitsaasunillu imaqarlualuni aamma iluaqutaassaaq ilai oqallisigigutsigit siunissami tungiuineq aamma qularnaarneqassammat nunami maani sulisartut tamarmik akileeqataasarnerisigut.

Kissaatigaarpuppi siunnersuut itisuumik oqallisigineqassasoq taamaattumik suliareqqitassanngorlugu Akileraartarnermut Aningaasaqarnermullu Ataatsimiititamut ingerlateqqinneqassasoq innersuupparput.